

**Prošer** [kowarjej]: Knjez kowarjo, smilće džě so a zdžeržće pachola. [Sam za so.] Kowaŕski so mi tak spodoba, njewěm čemu — dyrbbju jemu dobry być.

**Kowaŕ:** Haj wšak, Jan drje je mi prawy — ale ze žěntwu z mojej Hanku tola ničo być njemóže.

#### 4. wustup.

Prjedawši, Bosćij Natuš.

**Bosćij** [zastupuje, akty pod pažu njese]: Je pak to džensa wjedro — a njeje wusypaneho puća, sćežki. To wšak dyrbbju ja zaso trochu hary zehnać, wěšće budže hnydom lěpje. Dundyr nochcył!

**Kowaŕ:** Nó, Bosćijo, što tu tak pozdže k nam přikhadžeš?

**Bosćij:** Ja drje w tym njewjedrjenju sam wot so khodźił njebych, ale dyrbbjach džě wašemu kowaŕskemu papjeru — wšak wěšće: „pos“ — přinjesć. [Na Jana hladajo] Tak to z wami je — młodži ludžo, nihdže spokojom njejsće. Přeco byšće po swěće ćahali. — A mje wšak to po prawym ničo njestara [woćinja akty] takle — hm. Tule je papjera. — Ale radši hišće jónu pohladajmoj, hač tu zmylka za-  
lěžło njeje [powažnje]. Pola nas zastojnikow přeco wšo skoku dže, a lohecy so zamyliš — a hdyž ja za wšěm njepohladam, z cyła ničo khmane njeje, hm — sy kowaŕski?

**Jan:** Sym.

**Bosćij:** Hm. Mjeno: Jan Jakub Brězan.

**Jan:** Tak je.

**Prošer** [posłuchajo]: Jan — Jakub — Brězan! Spodžiwnje — tak mój syn tež rěkaše.

**Bosćij:** Staroba 25 lět — narodženy 3. winowca lěta 1879.

**Jan:** Haj.

**Prošer:** Božo Knježe — [stupa do přědka] narodženy 3. winowca 1879 — tež to so trjechi?

**Bosćij:** Hubu džerž, zo wěš — hdyž ja, kralowski zastojnik Bosćij Natuša, rěču, sy ty změrom, rozumiš? Ja, kralowski zastojnik, zo wěš!